

VENDIM
Nr. 535, datë 9.7.2026

**PËR PËRCAKTIMIN E KRITEREVE, TË PROCEDURAVE PËR PËRZGJEDHJEN
E ANËTARËVE, FUNKSIONIMIN, SI DHE MËNYRËN E USHTRIMIT TË
PËRGJEGJËSIVE TË KOMISIONEVE KËSHILLIMORE PËR TITUJT E NDERIT**

Në mbështetje të nenit 100 të Kushtetutës dhe të pikës 4, të nenit 14, të ligjit nr. 94/2022, “Për titujt e nderit dhe titujt vendorë të nderit në Republikën e Shqipërisë”, me propozimin e ministrit të Punëve të Brendshme, Këshilli i Ministrave

VENDOSI:

Miratimin e rregullave për përcaktimin e kriterëve, të procedurave për përzgjedhjen e anëtarëve, funksionimin, si dhe mënyrën e ushtrimit të përgjegjësive të komisioneve këshillimore për titujt e nderit.

I. PËRBËRJA E KOMISIONIT KËSHILLIMOR

1. Institucionet përgjegjëse për dhënien e titujve të nderit ngrenë komisionin këshillimor për titujt e nderit (në vijim, Komisioni Këshillimor), për të shqyrtuar paraprakisht nismat për dhënien e titujve të nderit, të cilat jepen në zbatim të ligjit nr. 94/2022, “Për titujt e nderit dhe titujt vendorë të nderit në Republikën e Shqipërisë”.

2. Komisioni Këshillimor përbëhet nga 5 (pesë) anëtarë, prej të cilëve 3 (tre) anëtarë të jenë punonjës nën varësinë e institucionit përgjegjës për dhënien e titullit dhe 2 (dy) anëtarë, personalitete të jashtme.

3. Komisioni Këshillimor ngrihet me urdhër të titullarit të institucionit përgjegjës për lëshimin e titullit të nderit. Anëtarët, personalitete të jashtme, përzgjidhen nga radhët e personaliteteve të njohura, që kanë dhënë kontribut në fushat përkatëse.

II. ORGANIZIMI DHE FUNKSIONIMI

1. Komisioni, në mbledhjen e tij të parë, zgjedh me shumicë votash kryetarin. Detyra e sekretarit të Komisionit Këshillimor kryhet nga një punonjës i administratës së institucionit, sipas përcaktimit në urdhrin për ngritjen e këtij komisioni.

2. Veprimtaria e Komisionit Këshillimor u nënshtrohet rregullave në fuqi për mënyrën e funksionimit të organeve kolegjiale. Vendimet merren me shumicën e votave të të gjithë anëtarëve.

3. Anëtarët e Komisionit Këshillimor, të pranishëm në mbledhje, nuk mund të abstenojnë.

4. Gjatë veprimtarisë së tyre, anëtarët e Komisionit Këshillimor i nënshtrohen legjislacionit për parandalimin e konfliktit të interesave.

5. Komisioni Këshillimor ngrihet për çdo nismë, kryesisht ose me propozim, që i paraqitet institucionit përgjegjës për lëshimin e titullit të nderit, jo më vonë se 60 (gjashtëdhjetë) ditë përpara datës së caktuar për nderim.

6. Mbledhja e parë e Komisionit Këshillimor zhvillohet jo më vonë se 5 (pesë) ditë nga ngritja e tij.

7. Në mbledhjen e parë, Komisioni Këshillimor njihet me objektin e veprimtarisë dhe shqyrton dokumentacionin që shoqëron praktikën.

8. Në çdo mbledhje mbahet procesverbal, ku pasqyrohen data dhe vendi i mbledhjes, anëtarët që marrin pjesë, çështjet që diskutohen, vendimet e marra dhe rezultati i votimeve.

9. Procesverbali mbahet nga sekretari dhe u paraqitet për miratim dhe nënshkrim të gjithë anëtarëve në fund të mbledhjes ose në fillim të mbledhjes pasardhëse.

10. Komisioni Këshillimor shqyrton dhe jep mendim, për:

a) plotësimin e kushteve dhe të kriterëve ligjore formale nga kandidaturat e propozuara për titullin e caktuar të nderit;

b) të dhënat biografike të kandidatëve, që mbështesin meritën për përfitimin e titullit të nderit;

c) të dhënat biografike, nëse ka, të cilat i kundërvihen meritës;

ç) motivacionin që duhet të shoqërojë dhënien e titullit të nderit për kandidatët e propozuar.

11. Komisioni Këshillimor harton raport për çdo kandidaturë që shqyrton dhe përpilon rekomandim me shkrim për dhënien ose jo të titullit të nderit. Rekomandimi i Komisionit Këshillimor nuk është detyrues për institucionin përgjegjës për dhënien e titujve të nderit.

12. Komisioni Këshillimor, pasi merr praktikën që përmban propozimin ose nismën, i kërkon me shkresë Autoritetit për Informimin mbi Dokumentet e ish-Sigurimit të Shtetit (në vijim, Autoriteti i Dosjeve) informacion lidhur me ekzistencën në dokumente të ish-Sigurimit të Shtetit të informacioneve për kandidatin. Përgjigjja e Autoritetit të Dosjeve jepet sipas përcaktimeve të pikës 2, të nenit 29, të ligjit nr. 45/2015, “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë”, të ndryshuar.

13. Kur përgjigjja nga Autoriteti i Dosjeve vjen negative për kandidatin, Komisioni Këshillimor vijon procedurat për shqyrtimin e praktikës. Kur Autoriteti i Dosjeve konfirmon ekzistencën në dokumente të ish-Sigurimit të Shtetit të informacioneve për kandidatin, Komisioni Këshillimor, nëpërmjet sekretarit të përgjithshëm, informon titullarin e institucionit për konstatimin e papajtueshmërisë. Në këtë rast, praktika arkivohet pa veprime të mëtejshme.

14. Në rastet kur praktika është mbështetur në propozimin e institucioneve me të drejtë ligjore propozimi, Komisioni Këshillimor shqyrton nëse propozimi është depozituar sipas afatit minimal 90 (nëntëdhjetë) ditë kalendarike përpara datës së propozuar për dhënien e titullit dhe, në rast se ky afat nuk është respektuar, shqyrton nëse janë paraqitur shkaqe objektive ose të justifikueshme, të cilat lejojnë trajtimin e praktikës si rast përjashtimor pa cenuar kryerjen e rregullt të procedurës deri në datën e propozuar për akordimin e titullit të nderit. Gjithashtu, komisioni verifikon nëse dokumentacioni i propozimit plotëson kërkesat lidhur me përmbajtjen, sipas përcaktimeve të pikës 2, të nenit 13, të ligjit nr. 94/2022, “Për titujt e nderit dhe titujt vendorë të nderit në Republikën e Shqipërisë”.

15. Në varësi të konstatimit, Komisioni Këshillimor vendos:

a) të vijojë me shqyrtimin e nismës ose të propozimit;

b) t’i kërkojë institucionit, që ka ndërmarrë nismën kryesisht ose institucionit propozues plotësimin e të metave të propozimit për nderim brenda 10 (dhjetë) ditëve;

c) t’i dërgojë institucionit përgjegjës për dhënien e titullit rekomandimin për mospranimin e propozimit, kur ai është paraqitur në një afat më të ngushtë se afati 90-ditor i ligjit dhe nuk janë evidentuar shkaqe justifikuese për vijimin e procedurës përtej afatit.

16. Komisioni Këshillimor, kur çmon se praktika duhet të plotësohet me të dhëna dhe informacione shtesë, krahas informacionit e dokumentacionit të paraqitur në nismën ose propozimin për nderim, kërkon informacione ose dokumentacion shtesë nga shtetasi i propozuar për nderim, si dhe nga çdo person fizik ose juridik apo organ publik, vendas ose i huaj, që disponon të dhëna të vlefshme për shqyrtimin e plotë të nismës ose të propozimit. Kërkesa përcillet zyrtarisht nga sekretari i përgjithshëm i institucionit. Në shkresën përcjellëse informohet edhe për afatin, si rregull, 10-ditor, për të cilin Komisioni Këshillimor mbetet në pritje të përgjigjes.

17. Në çdo rast, Komisioni Këshillimor çmon se cilat fakte konsiderohen të provuara, bazuar në parimin e nderimit publik dhe të vlerësimit të kontributit, në vlerësimin e hollësishëm të informacioneve dhe dokumentacioneve në dispozicion, si dhe në rezultatin tërësor të shqyrtimit, duke hartuar për këtë qëllim raportin përkatës.

18. Komisioni Këshillimor shqyrton praktikën dhe dërgon mendimin për përmbushjen ose jo të kriterëve për nderim, si rregull, brenda 30 (tridhjetë) ditëve nga marrja e vendimit për vijimin e shqyrtimit të propozimit ose nga plotësimi i të metave të tij. Procesi i shqyrtimit të nismës ose propozimit mund të shtyhet, me miratimin e titullarit të institucionit, përtej afateve të përcaktuara për shkak të rrethanave të paparashikuara, që dëmtojnë reputacionin e vlerën e aktit të nderimit në opinionin publik, deri në sqarimin e këtyre rrethanave.

19. Në përfundim të shqyrtimit, Komisioni Këshillimor i dërgon institucionit përgjegjës për dhënien e titullit mendimin e arsyetuar, për:

- a) miratimin e nismës ose të propozimit;
- b) refuzimin e nismës ose të propozimit për shkak të mosplotësimit të të metave brenda afatit 10-ditor ose për shkak të mospërmbushjes së kriterëve, sipas këtij ligji.

20. Ngarkohen institucionet përgjegjëse për dhënien e titujve të nderit, përcaktuar në ligjin nr. 94/2022, “Për titujt e nderit dhe titujt vendorë të nderit në Republikën e Shqipërisë”, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama